

學

易

集

一





學 易 集

(一)

劉 跂 著

四庫總目提要

學易集。宋劉跂撰。跂字斯立。東光人。家于東平。尚書右僕射摯之子也。宋史附見摯傳。稱其能文章。遭黨事。爲官拓落。家居避禍。以壽終。而不詳著其仕履。惟晁說之景迂生集有所作跂墓誌。稱跂登元豐二年進士。初選亳州教授。元祐初。除曹州州學教授。以雄州防禦推官知江州彭澤縣。其後改管城。蘄水。所至有政聲。復主管成都府永寧觀。政和末。以朝奉郎卒。所敍生平梗槩。頗爲詳悉。說之又稱跂晚作學易堂。鄉人稱爲學易先生。其集名蓋取諸此也。紹聖初。摯以黨籍貶新州。卒于貶所。建中靖國初。跂伏闕籲寃。得復官。昭雪。世稱其孝。呂本中東萊詩話稱跂初登科。就亳州。見劉攽所稱引。皆所未知。于是始有意讀書。厥後與孫復、石介名相埒。蓋其行誼學問。均不愧于古人。所作古文。類簡勁有法度。詩則多作黃庭堅體。雖時露生拘。要自落落無凡語。江西宗派圖中不列其名。殆以摯爲朔黨。門戶不同歟。然淳熙中。呂祖謙奉詔修文鑑。多取跂作。其辨寃時上執政啓。所云晚歲離騷。魂竟招于異域。平生精爽。夢猶託于故人者。呂本中詩話及王銍四六話。亦均推其隸事之工。卽以文章而論。亦北宋末年卓然一作者矣。其集原本二十卷。陳振孫書錄解題謂最初李相之得于跂甥蔡瞻明。紹興間。洪邁傳于長樂官舍。後施元之刻板行世。宣防宮賦。學易堂記。世尤傳誦。今元之舊刻。久無傳本。惟永樂大典內所載跂詩文頗多。雖未免有所脫佚。而掇拾排次。尙可得十之

六七共錄爲十有二卷。今恭承聖訓，于刊刻時削去青詞，以歸雅正。其同天節道場疏、管城縣修獄道場疏、供給看經疏、北山塑像疏、靈泉修告疏、仁欽陞坐疏、請崇寧長老疏，以及爲其父母舅氏修齋諸疏，皆跡涉異端，與青詞相類，亦槩爲刪除。謹重加編次，勒爲八卷，併敬錄諭旨，弁諸卷首，用昭鑑古斥邪之訓，垂萬世擇言之準焉。

學易集目錄

卷一

賦一首

五言古詩二十七首

卷二

五言古詩十九首

七言古詩十首

卷三

五言律詩四十五首

五言排律三首

七言律詩三十四首

卷四

五言絕句十八首

七言絕句六十三首

卷五

表十一首

露布二首

策問七首

啓六首

書七首

卷六

序十一首

碑一首

題跋三首

卷七

傳二首

卷八

誌銘十首

詩一首

記五首

贊三首

銘四首

誌銘六首

行狀二首

祭文六首

學易集卷一

賦

宣防宮賦

余以事抵白馬。客道漢瓠子事。感其語。故賦。

元封天子既乾封。臨決河。沈璧及馬。慷慨悲歌。河塞築宣防之宮。燕其羣臣。乃稱曰。隕林竹兮。捷石菑。宣防塞兮。萬福來。顧盼意得。詔問東方大夫樂乎。朔進而跪曰。君王佩乾符。妥坤靈。封岱岳。禪云亭。雷行焱。馳一蹕。四海力餘氣盈。爰覽德水。至于人靡遺智。天不愛祉。石城金墉。屹立亭峙。則又經廣輪。度棟宇。徘徊領略。心解目覩。八隅九維。千門萬戶。沈嚴神麗。秦帝之府。于是植翠華。噴靈籟。觴川流。浩長歌。神哉沛。君心和。患去喜至。無所復加。可謂樂矣。然臣觀之。未可謂無憂也。天子愕眙不怡。少焉顧曰。亦有說乎。朔再拜曰。主臣蓋聞大川之源。發乎崑崙。崑崙之神墟。出陽紆。與陵門。導積石而沈浮。包渾淪與俱遊。羌齊魯其徂征。千里一曲。萬里九折。盤礴瀆滉。呼欲洶。湧然長波。激爲迅湍。莽不知其幾何。遂異派而同瀾。已而略廣武。循大伾。麟沛轅洛。積爲委輸。潢沸出乎地上。悅莫際其焉如。粵若神禹。繼道作德。範圍天儀。聯絡地脈。疏排滌漫。鑄鑿峯峯。平野其藝。人有安宅。化鱗介爲冠冕。蓋千有八百國。臣曾問遺黎。遵海隅。繇平

宋 劉 跂 撰

成之徒駭。下東光之胡蘇。淵然覆醜。脩若馬頰。如鬲及盤。以簡以潔。太史分流。參匯衆折。然後安翔徐回。脈脈並醜。紆餘衍漾。緜眇逶迤。虬潛蛟伏。波不得興。視榮光與休氣。茂玉檢而金繩。煥乎三日而五色。何必千歲而一清。若夫羣雄逐兮。位隔并。山川圍兮。氣弗宣。託洶湧以爲貨兮。阻塵屨以自藩。崇墉連蜷。蟲以相雜兮。巨浸澆滯。汨乎宛延。立遮害之亭。謹白馬之津。雉堞瞰其東。甌脫臨其西。又東北留其行。又西北擊其歸。垂天之翼。橫海之鱗。脛墮膠葛。曾不得搶榆枋。而泛蹄泔。芻芻勃鬱。靡所容怒。霆擊電掣。欸已脫兔。益以桃花之流。駛乎竹箭之馭。彌滿瀕洞。千里四顧。乃始伐薪石。程畚鍤。汰鷄距之防。橫鋸牙之木。上下連環。旁側伏闕。竹落千緡。夾艘而下。岌乎隄牛。蹶若隄馬。糗糧齊山。徒庸成林。商羊鼓舞。澤門謳吟。析骸樵蘇。慘于長平之禍。累塊珠玉。埒乎水衡之藏。諒人謀之或違。將度數之適逢。今夫呼吸潮汐。關竅丘源。洲潭浮空。滙洄旁穿。井乍甘而撤舍。麥未稿而培根。何靈鼈之下伏。寓三峯乎層巔。表泰紫之雌曉。陋靈光之巋然。長封爲局。土鍵石鏽。守如峭函。萬葉不拔。然而燕雀賀而人弔。枝葉茂而本撥。財乏力屈。河且再塞。君王方且駐屬車。以流觀。啓離宮而落成。卻四載之乘。勞負薪之臣。舉烽賦酒。飛輪奉牲。戢長慮于一笑。起駕望而憑陵。神閒意定。澹然無營。語未既。天子數顧尙席。推几欲興。臣朔逡巡卻立。不謝而退。其後館陶之役。竟如東方大夫言。

五言古詩

寄劉仲平

移居逼城阿。頗似山中住。當軒列佳石。繞舍紛高樹。園林便爲主。魚鳥欣相聚。春來物物好。意適隨所遇。是適本無因。亦復無定處。當有忘機人。知我此中趣。

重寄

憶昨去國初。置傳史所監。季也行泣隨。往舍都城南。沐我屢飯我。終此一日淹。明作分嶺水。苦別心如慳。邁歸護孳重。卻掛東川帆。停橈憩汴泗。攬轡趨霍潛。開關又相對。共被棲窮簷。未畢十日歡。已復秣征驂。猗嗟季行役。曷日弛負擔。長懷芳草句。未讀衣已沾。先人門戶事。驚力詎克堪。一朝奇禍發。熾甚烈火炎。頑迷得憂辱。自取非謗讒。危巢風雨漂。菅蒯不足芟。于時季來歸。棄官不待占。收合敗散餘。賴此守獨嚴。闔門數百指。一一恩意涵。輯睦乖廷情。牢不見隙纖。聚糧非短穀。千里均屬厭。囊書動高聽。恩環賜東漸。吾親所奇貴。挺立故不凡。晚節就難冀。前非掩多慙。正如已覽人。歛起蒙鍼砭。衰顏積霜雪。幸亦解羈銜。昨從憂迫來。將復見安恬。西廊坐食菽。可以慰飢饑。漸欲親酒盞。頗思疎藥奩。願季愛玉體。象我及西崦。從今荷明時。歡樂百無嫌。酬恩無處所。香火供瞿聃。

集句寄斯川

渺渺孤舟逝。計日望舊居。萬族各有託。吾亦愛吾廬。栖栖失羣鳥。暫與田園疎。今日始復來。再喜見友于。緬然睇崇丘。負疴不獲俱。試攜子姪輩。且還讀我書。親戚共一處。過此奚所須。起晚眠常早。誰謂形迹拘。厚恩固難忘。慨然念黃虞。養真衡茅下。不樂復何如。

寄馬全玉

歲月如歸鴻。秋至欲將翔。郊原帶爽氣。榆柳媚無光。客子抱幽獨。耿耿誰與明。不辭青鞋賤。來躡君子堂。君子松檜姿。勁不慘風霜。其交淡如水。衆口未易嘗。忘言默領會。此意卻難忘。不飲知酒趣。聊復酌公漿。寒燈夜寥闐。一笑未渠央。誰令別離此。夢寐長相望。

寄尹遷介叔

〔案〕後五首。疊前五首韻。當別有標題。爲傳寫者脫去。連爲十首。

我生非良材。頑礪不受礪。讀書但漁獵。初不名一藝。形骸弱如柳。暑雨更疲曳。清風何時生。一掃去酷吏。孫友太瘦生。相遇一何闊。途窮欲改操。冉冉在故轍。贈君七年艾。輒爲兒女奪。養生有標本。姑息良已未。我有好詩酒。端爲舅氏作。陳遵見張竦。雖見不改樂。小官未朝謁。日日事飲博。書來託天真。笑我守糟粕。二尹山東秀。一第安足賀。滕侯薦鸚鵡。書極口良未過。青衫五斗米。所要脫飢餓。自重士當然。蓄積非爲貨。前年郭法曹。寓直經略院。同時幕府歸。獨送兩秋燕。新書滿百帙。鉛槧老不倦。他時淮南子。試爲離騷傳。養志如養力。益峻在益礪。大方略畦畛。小智私才藝。古來要倔彊。檻折不可曳。何謂薛贛君。小生敢相吏。擇術患不終。未易笑迂闊。發輟三尺輪。不改萬里轍。死生漢節共。巨猾氣爲奪。坐令李都尉。慟哭天壤末。鷗夷笑并瓶。同是意匠作。拘方等歸盡。放意差獨樂。往時二千石。天子償負博。彼視淑德侯。何堪貯糟粕。歌詞郢中來。未數白與賀。一斑昧全虎。端似隙中過。可憐光萬丈。不救妻子餓。平生嚴鄭公。卓犖有餘貨。吏隱非山林。州府爲道院。莫夸非食肉。虎頭頷如燕。公田亦種秫。警去飛鳥倦。何用肅德施。先生自爲傳。

送陳述之

羸軀抱肺惡。喘甚劇犇豚。水飯輒短氣。矧敢近酒尊。君亦謝嵇阮。力醜不盈分。相看但蕭索。何以慰離羣。往昔各少年。束帶登橋門。白眼霄漢際。冥鴻注孤鶩。我髯今蒼黃。君髮亦翩翩。同吏一州縣。凍螢彊相溫。脰頽歲月去。此事更誰怨。願君愛玉體。長使百憂諼。非關易斗粟。政恐耕耘煩。他時老相問。一笑坐忘言。

送徐彥榮

嬋娟水邊楊。宛是涓川竹。光翠相動搖。照我尊酒綠。松風含衆籟。雲月澹華燭。何必簫與鼓。清言媚幽獨。當年妙風致。文采自膏沐。會逢百鍊明。照此燕趙玉。晨風惜行色。車騎喧出宿。一笑如未忘。新詩寓歸僕。送劉貢甫貶衡州

洞庭木葉下。衡陽鴻雁飛。放舟河之水。歲暮以爲期。豈曰無徑路。大直固逶迤。波平弭桂棹。風清捲蘭旗。紫蟹間丹鯉。霜蓴兼露葵。醉歌寒杜若。還以寄相思。不厭道里遠。所嗟時序移。會登崑崙丘。遂索玄珠遺。以茲鼓枻去。曠若不可追。乃知體道人。涉世自有宜。入獸不亂羣。安肯陋九夷。如何錄錄者。反笑抱關爲。次黃完仲見寄韻

讀書老無味。記一輒忘十。視昔那得超。但覺有不及。誰能求甚解。拘窘被書塾。爲文亦爾爾。造語取易給。未足解客嘲。況復令鬼泣。柴門一鵲噪。童稚迎信入。開緘故人書。快閱驚喜集。新詩瑩病目。儼若冰玉立。才兼劉柳健。思鄙郊島澀。定從西山來。爽氣扶岌巖。惠然遠見屬。疑我故閑習。叢臺三晉舊。鎮靜無警急。

府寬郎幕尊。森衛走呼吸。以茲書檄省。頻歲息篇什。神交庶暫對。悅不闕川隰。盧溪白士藪。野處分屣笠。如聞趣歸裝。早作下車揖。吾廬雖庫陋。雅亦便樵汲。無酒或過雄。有酒誰饋餒。何時甲乙第。版築見君葺。比鄰或借倩。梨棗亦得拾。不恥共秃翁。相攜走城邑。

次孫元中至後五日遊蔡氏園韻

林深宜夏炎。亦復便冬冷。居然安穩處。合是招提境。晴煙起屋脊。煦日下天井。飽飯策杖出。如行贊公嶺。平生一丘壑。快眼春睡醒。誰言城市喧。能比郊原靜。人間會合少。萬事等泡影。適意不自取。兀立真土硬。時平日月好。歲熟羈旅幸。逢人但懽喜。得酒便酩酊。知我非子誰。頻來不須請。

費家風次韻二首

行年病肺熱。當暑極燔炮。宵分偶小息。起步駐涼颺。咄此怪事發。天北起喧囂。扶搖駕霹靂。萬竅爭怒號。雙耳不及掩。對語何由交。木作麻葦拔。瓦如埃壘飄。顛嗽怖欲死。一一驚兒曹。所憂吾其魚。遑賦屋上茅。須臾事亦定。骨肉相勤勞。東方漸杲杲。音響爲誰銷。風雷助神物。茲理古不空。邂逅一夕事。知有費家風。洛橋誦書女。涇川牧羊童。不知費氏子。業力與誰同。便能役蜚廉。頗復鼓豐隆。坐令城郭人。任爾動用中。劍出延平水。竹化葛陂翁。況爾得人趣。變現豈易窮。時時要雨澤。裨暑殊未終。勿逢金翅王。非爾能長雄。

子和惠贖佳什。惇敘世契。誦詠感慨。情見乎辭。因次其韻。

恭聞裕陵初。文物萬古先。仁英所造士。臺閣徧招延。堂堂丹陽公。發軔自賓筵。惟我先大夫。整駕亦周旋。一時起接武。千里稱比肩。俱陳曲臺議。共校天祿編。心期久相契。燥濕無改絃。晚登廊廟席。玉筍照華顛。廐馬並飛蓋。齋榻連脩椽。到今啓事帖。尺牘餘藤牋。憶我旣冠後。羣趨集英前。公持柱史橐。水鏡資平銓。謂宜掇上第。擊節稱奏篇。聲名竟寂寂。感遇空拳拳。事過劇脫兔。邇來三十年。翰墨恍未落。拱木森已圓。嗟哉最孤露。罪戾深益纏。迷途雖云指。頑質何由鑄。以茲衆惡歸。白首猶迍邐。屢驚流夜郎。敢望尉通泉。絃腸恐齊斷。身璧欲俱捐。豈知巢傾覆。胎卵卻復全。聖主日方中。照曜無黨偏。宸筆下霄漢。一洗空宿愆。生還出望外。喜極悲淚漣。詩書手自束。衣袂輕欲翾。猶憂抱沈瘵。針石久未蠲。竭來問醫藥。踰蹻淮之壖。追惟曩時樂。夢破無重眠。疇知王公子。但說副車賢。持帶走窮隸。趣駕來飛旃。勞我鬢霜雪。歡顏語嫵娟。北堂太夫人。備福獨繇繇。往者三殿朝。吾親亦班聯。問訊逮妻女。悲歡深愴然。升堂一拜阻。自痛久拘繫。念子事方殷。使客舟車駢。撥忙屢顧盼。尊酒勸留連。新詩又來辱。巨軸星斗懸。七字健欲活。靡靡爭春妍。夷塗取驟驥。武庫出戈鋌。驟聞吳叔辯。霍然病欲痊。感子重拜嘉。儻未溝壑填。西風理歸棹。往稼汶陽田。王塗正清廓。天子仁如天。軒冕豈不好。于我亦青氈。政惟蕭丘火。寒焰寧復燃。亨衢子當騁。願言早著鞭。高閔富令息。贖子亦所憐。世交固未替。更賴清白傳。

秋懷次四姪韻五首

涼颼起天末。倏已掃庭戶。光鮮向時柳。慘淡非其故。鉛華不足恃。美人抱幽素。窮吾分當爾。不爲讀書誤。

行樂北山路。縣力涉逶迤。諸郎騁逸足。掩冉去莫羈。歸坐獨兀兀。糜粥聊自資。狂瀾成止水。吾病真吾師。顯氣日且肅。鳴絃此其時。泠泠矢古音。慷慨不勝悲。翔颺媚百卉。苦雨何紛披。曲罷自澄寂。霜風皎冰姿。千古柴桑翁。于酒頗能全。絕知閒居樂。雅乏從事賢。傾心禱王母。更欲丐長年。緬思東籬下。想望故悠然。窮簷詎云陋。霜月粲孤明。空山值飢虛。秋菊餐落英。吾衰抱沈瘵。玩物得我生。循分各有適。天公一何平。

學易集卷二

五言古詩

宿靈泉寺二首

石磴排林端。路轉陰嶺滑。側身長風外。凜落天爲闊。冉冉光風浮。金輪起天末。團團芳桂樹。隱隱蛩之幽。敷坐翳其陰。酌彼飛泉流。絲桐壞友人。寫我心離憂。

滑家橋逢壞舟者有感而作

橋傾若車翻。舟破如瓦解。二禍適相觸。生此大狼狽。齊生海邊人。試吏今得代。鄉閭恍在望。舟楫信所快。頗知大道夷。不避小物礙。撐夫虎豹健。力出馳突外。何其一跌傷。脫若葱與蒯。疾雷不及聽。生理歛焉壞。瓦飛昆陽戰。鶴唳淝水敗。身非呂梁叟。沉沒豈不殆。嬌兒年十五。八歲又其妹。豈伊瞬息間。生死不相賴。死者長已矣。生者心破碎。泣盡繼以血。耳目坐盲瞶。哀哀天無情。皦日爲昏憤。徐觀水中意。波浪自澎湃。我來獨心惻。涕出增感慨。頃年岳陽下。憂患亦顛沛。脰頹萬死中。血肉偶俱在。今此溝澮狹。豈復江湖大。咄汝豈不仁。曾獨與禍會。冥冥倘有主。焚溺甚菹醢。不然遭無辜。神理良汝給。從今十手指。永是後車戒。靈均苦讒舌。潁士厭沈瘵。良時不似昔。努力善自愛。我亦乘小艇。兀兀信所屆。搜求得餘尊。聊以勞疲憊。雖徵西江闕。勿厭升斗隘。歌闕從此辭。人生慎行邁。

宴左山二首

閏冬節物晏。十月猶素秋。招提陽岡路。宛在峴山頭。史君有高致。尊酒擅一丘。歎顏動長嘯。松菊含春柔。風清宿霧斷。地迴行潦收。時令將凜落。飛光爲誰留。行飯轉北岡。如登贊公嶺。悠然竟晴日。終比城市永。殘霞澹微照。遙林耿疎影。天空氣象杳。落落見此境。彼哉不自愛。快意烹五鼎。來日苦大難。忘言得深領。

題東道輔懷疏亭二首

逢時樂宦達。既達貴蚤休。東門兩歸客。冉冉不可留。大夫名賢後。出處亦俱優。築室在何許。南郭林塘幽。安車搖佩魚。步屣隨杖鳩。勝日至佳客。懽顏終獻酬。鄙人最樗散。世用一何繆。政以無事身。尊俎常見收。今年掃三徑。近不隔虎丘。欲問杜陵老。來往幾風流。賢哉疏太傅。遺榮歸印綬。當時漢廷臣。未省出其右。進爲豈不能。止足吾所守。驅車曉出關。祖帳已芻狗。惟餘清風在。竹帛端不朽。大夫懷家聲。相望千年後。結廬離城郭。興致寄林藪。華髮映童顏。如公殆無有。何必松與喬。豈弟神所壽。嗟余真漫浪。持是終安取。敢言六百石。固已愧升斗。行當自免去。執謁隨隣叟。縱復無新詩。猶期飲醇酒。但問客如此。亦許登亭否。

秋夜自瀘溪泛舟入澤潑二首

浮舟入浩渺。有楫任逶遲。望迷烟樹合。影迴星漢移。清靜水月界。身到始應知。

山橫染黛碧。波散湧金明。風微葭葦靜。露寒魚鳥驚。絕境不得到。愁隨歸棹生。

舟行懷斯川用王介甫韻

邁往欲何之。緩行聊爾爾。悟身無期會。在彼猶在此。輕舸類短鞍。安取途九軌。所嗟湍流長。汨沒未及已。兼葭鴈鷺澤。清淺良可喜。美人詎云遠。耿耿隔一水。憐我抱沈痛。藥劑厭餘滓。談笑何時來。幽憂賴湔洗。

晁端州秀宴席

同寮貴公子。好事敵原嘗。晁侯更蕭散。不愛囊中裝。步兵玉觥滑。洞庭金丸香。宛轉蓴帶細。紛綸鱸縷長。鮫魚三百斛。豈必河之魴。咄嗟事便辦。侍御色不忙。熙熙春臺上。醉語各相忘。湯餅最後出。雖飽別有腸。願君善遇客。懽樂殊未央。不須投車轄。敬舉主人觴。

和梁十登三學閣

屏居倦煩促。約此塵外遊。于我快兩目。云誰翻百憂。蒼山東北秀。野水西南浮。平生林壑心。今老此一丘。悲風入叢薄。掃迹瓜芋疇。高樹未搖落。鼎鼎彌道周。感此節物化。渙忍何當休。幻事涉苦海。禪心得中州。徙倚到無言。風鈴聲更幽。新詩出肺腑。明月非暗投。終篇不及酒。似非我一流。願爲靈泉去。醉語看橫秋。

與諸人步郊外作寄舍弟斯川

行年踰六十。衰墮百慮休。新春逢佳日。忽漫思出遊。隣曲四五人。風味成一流。步履相後先。散若水上鷗。重城未云遠。乃得此林丘。緬懷斜川人。疎野更無儔。千載今日歡。政爾聊相酬。誰言恨枯槁。茲語當信不。